

忻州志卷三十

賢良

晉

秦秀字元良新興雲中人魏驍騎將軍朗子少敦學行以忠直知名咸甯中爲博士何曾卒下禮官議諡秀議諡法名與實爽曰繆怙亂肆行曰醜曾之行已與此同宜諡繆醜公時雖不同秀議而聞者懼焉秀性忌讒佞疾之如讎素輕鄙賈充及伐吳聞其爲大都督謂所親曰充文案小才乃居伐國大任吾將哭以送師或止秀曰昔蹇叔知秦軍必敗故哭送其子耳

忻州志

卷三十

賢良

一

今吳君無道國有自亡之形羣率踐境將不戰而潰子之哭也旣爲不智乃不赦之罪於是乃止及孫皓降於王濬充未知之方以吳未可平抗表請班師與濬告捷表同至朝野以充位居人上智出人下僉以秀爲知言及充卒秀議充舍宗族弗授而以異姓爲後諡法昏亂紀度曰荒請諡荒公不從王濬平吳而爲王渾所譖毀帝雖不從無明賞罰以濬爲輔國大將軍秀上言輔國之號率以舊恩此爲王濬無功之時受九列之顯位有功之後更得寵人之辱號也四海視之孰不失望蜀小吳大平蜀之後二將皆就加

三事今濬還而降等天下安得不惑乎後與劉暉等同議齊王攸事除名尋復起爲博士秀性倬直與物多忤爲博士前後垂二十年卒於官

北漢

陳元達字長宏新興人少孤貧躬耕誦書樂道行詠忻忻如也至年四十不與人交通劉元海爲左賢王聞而招之元達不答及元海稱號人謂元達曰君其懼乎元達笑曰吾知其人彼亦諒吾之心不日驛書至矣其暮果徵爲黃門郎旣至元海曰卿若早來豈爲郎官而已元達曰臣惟性之有分盈分者顛臣恐大

忻州志

卷三十

賢良

一一

王賜處非分是以抑情盤桓待分而至元海大悅在位屢進忠言焚諫草雖子弟莫得知也及聰嗣位忠諫如故聰每謂元達曰卿當畏朕反使朕畏卿乎元達對曰臣誠闇魯賴陛下恩顧使臣得盡愚忠昔世宗遙可汲黯之奏恢隆漢道桀紂誅諫幽厲弭謗亡也忽焉願陛下捐商周覆國之弊模孝武光漢之美則天下幸甚元達歷廷尉左司隸御史大夫儀同三司後王沈等構逆聰爲所愚誅綦母達公師彘王琰田歆陳休卜崇朱誕等皆羣闇所忌也侍中卜幹泣諫謂因左右之言一日尸七卿何以示四海因叩頭

流血元達復與劉易劉敷極言沈等殘毒忠善且言
比年地震日蝕雨血火灾皆沈等之由聰以表示沈
等笑曰羣兒爲元達所引遂成癡也寢之復訪粲粲
盛稱沈等忠清乃封沈等爲列侯太宰劉易復詣闕
上疏固諫聰大怒手壞其表易遂忿恚而死元達哭
之悲慟曰人之云亡邦國殄瘁吾旣不能復言安用
此默默生乎歸而自殺人皆寃之

按史元達本姓高以
生月妨父故改云陳

金

張翰字林卿忻州秀容人大定二十八年進士調隰州
軍事判官有誣昆弟三人行劫者翰微行廉得其狀

忻州志

卷三十

賢良

三

白於州釋之歷東勝義豐會川令補尚書省令史除
戶部主事遷監察御史母憂服闋調山東路榷鹽使
父憂起復尚書省都事轉戶部員外郎大安間充行
省左右司郎中屢爭參政承裕與平章獨吉思忠論
議不叶處置乖方多不見省及承裕就逮衛紹王知
翰嘗有言召見撫慰改知登聞鼓院遷侍御史貞祐
初爲翰林直學士充元帥府經歷官中都戒嚴調度
方殷改戶部侍郎宣宗遷汴翰規措扈從糧草至真
定上言五事一曰強本謂當哀兵徒徙豪民以實南
京二曰足用謂當按蔡汴舊渠以通漕運三曰防亂

謂當就集義軍假之官印使相統攝以安反側四曰
省事謂縣邑不能自立者宜稍併之既以省官且易
於備盜五曰推恩謂當推恩以示天子所在稱幸之
意上畧施行之翰雅有治劇才所至輒辦遷河平軍
節度使改都水監提控軍馬使俄拜戶部尚書時初
至南京庶事草畧翰經度區處皆有條理是歲卒諡
曰達義

元

劉宣字伯宣其先潞人也因出戍留居忻沉毅清介居
家孝友自幼喜讀書有經世之志宣撫張德輝至河

忻州志

卷三十

賢良

四

東見而器重之薦爲中書省掾宣暇則往從國子祭
酒許衡講明理學初命爲河北河南道巡行勸農副
使旋改行省郎中從丞相伯顏統軍平江南宣贊畫
居多除同知浙西宣慰司在官五年威惠並著至元
二十三年入爲禮部尚書遷吏部時將伐交趾宣言
安南臣事有年歲貢未嘗愆期邊帥生事興兵彼因
避竄海島交廣炎瘴之地盛夏毒氣害人甚於兵刃
且溪洞寇盜常多萬一奸人伺隙乘虛告變難卒應
敵須與深知軍體者論量萬全及再征日本宣又言
數年間湖廣江西供給船隻軍需糧運官民大擾今

不宜再擾日本海洋萬里萬一不利焉能飛渡高麗
居陸地隋伐無功唐太宗英武親征徒增追悔况日
本僻在萬里哉帝皆嘉納是年中書議改鈔用錢宣
獻議力言不便會桑哥謀立尙書省以專國柄錢議
遂罷二十五年除行臺御史中丞時江浙行省丞相
忙古臺悍戾縱恣慮臺臣糾言其罪而尤忌宣陰使
窺伺臺中違失臺官皆懼往求自解惟宣不爲動忙
古臺怨宣愈甚羅織宣之子繫揚州獄又誣告行臺
沮壞錢糧以聞於朝宣及御史六人俱就逮既登舟
以軍船衛列宣遂自刎將行時宣書後事緘付從子
自誠令勿啟視及宣死後視之詞云觸怒大臣誣搆
成罪身爲臺臣義不受辱又別有公文言忙古臺罪
狀塗抹勾注辭句難辨後行省白於朝謂宣知罪重
自殺聞者莫不嗟悼延祐四年從子自持上宣行實
御史臺以聞追封彭城郡公諡忠憲宣忠義節操爲
一時所重生平講明理學深悉當世利病及行軍輸
餉之艱難故交趾日本之役以宣言遂止仁人之言
其利溥哉二疏及本傳皆載藝文

明

姜濤字伯源忻州人永樂甲午舉人除嘉興府同知代

還督工口外補河間府同知未幾守以事罷民爭走闕下祈濤知府事遂授知府值外艱民復走闕下祈留任遷順天府府尹時祀典牲醴諸費悉供自民間濤請出庫錢供役先是濤赴京時有王同知者與有隙王死妻子以事械入京師濤聞飲食之待有加禮又前督工時有舊官按察者在役亦與隙見濤恐懼不敢前濤與執手道殷勤如平生歡人皆稱其長厚遷戶部侍郎以疾歸未幾起督漕運倉儲卒於官濤清介雖久貴顯家故無中人產卒之日不能具棺殮訃聞賜祭葬如例

忻州志

卷三十

賢良

六

楊甯忻州人永樂乙未進士授戶部主事陞本部郎中有清節及卒止遺銀帶一圍子數尙氣節正統進士授雲南道御史以直言左遷新都縣有治稱孫玠有孝行

喬良忻州人景泰癸酉舉人授曲陽知縣安貧嗜學苦節當官冬一裘夏一葛卽宦邸猶然灌園有賈客訟失布良命舁邸舍抵門一巨石杖訊之觀者如市良佯言事不可白怒觀者各罰布償賈陰辨款識遂得盜者擢隴州知州清節不渝

張蕙忻州人成化丙戌進士授句容知縣擢御史甚有

風望按山東監試持法公嚴時稱得士陞浙江副使
以廉直忤時歸

楊戩字德儀忻州人成化甲午舉人初任通政司經歷
陞陝西秦州知州南直淮安府同知湖廣常德府知
府爲諸生時奮志力學剛方自守居官政尚嚴明吏
民畏服在秦州有徹底澄清之謠以不事中人劉瑾
罷瑾誅復官

黨承志字汝孝忻州人正德庚午舉人辛未進士授保
定府推官有疑獄立爲判決擢刑部主事會吏部司
屬缺員調驗封主事武帥導武宗巡行承志抗疏諫

忻州志

卷三十

賢良

七

言甚激杖於闕下未幾陞稽勲司員外嘉靖改元預
修武廟實錄充晉藩冊封使不受餽遺陞驗封郎中
議大禮抗疏忤旨復被杖調考功再調文選銓除擬
注各量才器請託不行擢通政司右通政提督武職
錄黃丁亥值災異詔求直言上條陳四事勢要銜之
以峭執論罷年七十三卒著忻州志

王玫字邦器忻州人正德己卯舉人歷許州訓導福山
知縣工部郎中學正行方在許簡赴大梁書院教士
有成效令福山大旱龜拆禱雨立降禾盡起有訴狼
噬其嬰者禱神捕之一狼就網若伏辜狀餘悉渡河

去又有蝗不入境麥穗兩歧之異士民作歌頌之清節不渝以剛正忤權貴罷居鄉多厚德咸推重焉

王治字本道忻州人嘉靖癸丑進士官行人八載乃遷吏科給事中請臨陣斬獲第錄將士功文臣及鎮帥不親搏戰者止賜賚從之再遷禮科左給事中隆慶元年偕御史王好問覈內府諸監局歲費中官崔敏請止之治力爭不許事竣劾中官趙廷玉馬尹乾沒罪詔司禮按問尋上疏陳四事一言定宗廟之禮獻皇雖貴爲天子父實未嘗南面臨天下雖親爲武宗叔然嘗北面事武宗今乃與祖宗並列設位於武宗

右未協古典臣以爲獻皇祔太廟不免遞遷若專祀世廟則億世不改乞敕廷臣博議一議謹燕居之禮竊聞燕閒舉動有非諒闇所宜者宜重之其二亦切直時多躋焉居諫垣十五載擢太僕卿憂歸卒賜祭葬

傅霖字應期忻州人嘉靖壬戌進士初授吏曹以宗親改壽州知州請罷壽春驛正陽鎮巡檢並協助征島金米遷大名府同知再遷河南僉事備兵睢陳實倉廩簡材勇大計爲權貴所構罷歸神廟卽位謂日者執政狗愛憎刺舉多不厭衆心命所司廉察以名上

除平度州知州遷湖廣荆西道會中貴營顯陵費役
萬計抗顏與爭並駁其履畝之舉艱歸補遼海兵備
道二年復爲同官所搆中以計典弟霈以御史家居
抗疏理其冤都御史亦以上聞詔以原官起用卒堅
卧弗起居鄉立祭田贍族人煮粥哺饑者

陳功字惟志忻州人隆慶辛未進士提躬冰立執法霜
嚴歷按詳讞惟明激揚不謬餽遺勿取舉薦謝金不
納過家有里人進錘以事託者叱絕之身後厥子稱
貸疊見幾不保故物焉

王致祥忻州人隆慶辛未進士爲兵科給事中十三年

忻州志

卷三十

賢良

九

上言祖宗法非宿衛士不得持寸兵今日夕內操使
羣不逞挾利器出入禁門禍不細上留致祥疏卽日
罷之累官右副都御史巡撫順天卒

傅霈字應霑忻州人參議霖弟忠鯁能任事萬曆丁丑
進士初授咸陽知縣庫吏進羨金叱還之恐其中飽
因取抵下戶丁徭補華亭革除縣櫃之役入爲監察
御史巡漕河時內供增二十萬金猶不足將取諸房
窖抗疏論之得中止按四川發大帥李應祥奸贓李
橐千金求免卒論罷有職憲副者怠於官亦糾劾以
去人病其執因告歸閉門纂晉文獻通志聞兄參議

被誣特疏白之先是江陵當國鄒總憲元標以爭奪情謫都勻需數往視爲措道里費

張泮字有源忻州人萬曆丙戌進士耿介廉直居銓曹嚴絕餽遺終養二十年朝野想望其丰采屢起留銓晉璽卿俱不出親歿從太原歸葬徒步哀泣感及行路尋補通政司參議冊封藩王王肩輿過節前泮正色斥之劾不敬奪祿遷太僕少卿薦守令一介不取晉光祿卿時閹豎弄權假內用冒破不貲疏正其罪卒曰遺橐僅十一兩殯葬不能具士論韙之子宏業死闖難自有傳

忻州志

卷三十

賢良

十

國朝

楊敬儒字恆南忻州人康熙庚戌科進士二十四年任臨湘縣秉性恬淡見事明決敢爲下車後值有裁革里長之議慨然以爲己任剔蠹除弊禁革冗費陋規不事敲扑而正賦輸將恐後里無追呼之擾清查屯荒招民開墾息民爭端修砌城垣振舉廢墜刑清政簡月課諸生手自評閱居常自奉甚薄疏食菜羹泊如也刻鄉約鐸書以化民成俗後行取監察御史清操愈厲嘗疏劾順天學政李光地奪情又疏請清丈田畝均湖南鄉試釐剔漕糧恤旗下奴僕皆切中利

病直陳無隱舊志稱爲不負所學云著有三柏堂集
楊述字彭似忻州人康熙庚辰科進士居家孝友處鄉
黨周急濟貧人所依賴筮仕盱眙清察利弊革除陋
規如帶征季鹽行戶之類悉行豁免一時有斷事如
神之頌因前任鹽臬未結罣誤歸里日與四方學者
課文講義發揮聖賢經傳微旨作制藝若干首以授
來學論者謂昌明博大可方思泉云桐城張相國廷
玉海甯陳相國世倌各有傳

崔映辰字斗南嶧次子乾隆庚寅科舉人戊戌科進士
歷山東新泰蘭山陽穀汶上日照知縣所至廉明慈

惠政聲籍籍會德平以漕務激變戕官委員亦被殺
嬰城固守人情洶洶大吏甚怒議以兵勦映辰請撫
之攜一僕單騎往諭德平民夙耳映辰名相戒毋犯
因責以大義皆感泣羅拜謂使君活我入署坐堂皇
錄首罪七人餘皆釋不問衆遂帖然事 聞 召
對 温語褒嘉超擢泰安府知府遷濟東泰武臨
道署按察使司映辰益勤於職遇事持正不少瞻徇
卒以此與撫軍忤被劾 上悉知映辰降曹州
府知府方駿駿進用而映辰以在河工積勞得嘔血
疾未幾丁繼母憂歸遂卒聞者咸惜之以爲未盡其

用云映辰少負異才又濡染家學文章雄駿有劉黃
岡風力與父牒並爲後學所宗稱爲西山先生有時
藝合刊行世

徐福麟字石甫忻州東曲家莊人家貧年十六卽出爲
童子師領道光丁酉科鄉薦甲辰大挑一等以知縣
分發四川咸豐元年赴蜀需次四年權威遠縣事十
月民情愛戴旋補鹽源與雲南永北接壤俗尙刁悍
劫案最多麟每擒獲皆盡法以懲莠民知畏嗣鄰郡
土匪蜂起日益蔓延因團鍊丁壯歷次擒剿邊境胥
安以功保同知直隸州咸豐七八年間滇中獮匪倡

忻州志

卷三十

賢良

十一

亂不逞之徒乘間滋擾永北騷動麟奉檄督團往勦
屢獲捷勝而棉花地一戰勦績尤著保知府銜換花
翎竟以積勞致疾於同治元年卒永北鹽源皆立廟
以祀有傳載藝文

大